

REGIONAL NEWS

HEADLINES :-

1. Larsap General (Rtd) Vijay Kumar Singh an thenawm ram Myanmar nena insumdawnna tur Kaladan Multi Modal Transit Transport Project hna thawh mekah India chuan a huamchhunga kawngpui a siamfel tawh a ti.
2. Mizoram chu ramchhunga cheng zat a chhuta Malaria vei tamna ber state a ni.
3. Pahalgam firfiaka chetna avanga Pakistan mite visa tihtawp anih hnuah Union Home Minister chuan state tin Chief Minister te chu an state theuha Pakistan mite zawng chhuak turin a ti
4. French President Emmanuel Macron chuan Pahalgam firfiaka chetna chungchangah India lamah a tang tlat tih a sawi.

<><><>

GOVERNOR

Larsap General (Rtd) Vijay Kumar Singh an thenawm ram Myanmar nena insumdawnna tur Kaladan Multi Modal Transit Transport Project hna thawh mekah India chuan a huamchhunga kawngpui a siamfel tawh a ti.

Vawiina Mizoram University Auditorium-a Mizoram University din champhaphak leh Silver Jubilee lawmna hun a hmanpuinaah he thu hi sawiin Larsap chuan India chuan kawngpui siam fel tawh mahse lehlam ram ten an la zawh ve theih loh avangin harsatna a awm a, hei hi chinfel dan kawng a hmuh mai theih a beisei thu leh harsatna hrang hrang chinfela kawngpui siam zawh a nih chuan danglamna ropui tak a thlen a beisei tih a sawi.

Larsap chuan Mizoram chu khualzin hip nana hmun duhawm ber pawl leh theihna nei sang, sanctuary pawh paruk lai nei a nih thu a sawi a. Heti zat sanctuary nei chung a khualzin hip kawnga Mizoram theihtawp a chhuah lo a nih chuan a hlawhchham dawn tih a sawi.

Larsap chuan Mizoram University in kum 25 a tling chu a lawmpui thu sawiin kum 25 kalta chhunga hmasawnna hrang hrang a hmuh chu thil chhinchhiahtlak tak a nih thu a sawi a. NAAC A grade a neih te leh NIRF top 100-a a tling leh India today ranking-a top 30 a ni thei chu lawmawm a tih thu a sawi a. Zirna mai bakah Mizoram University chu zirna in mawi leh chhelvel ram ngaw nei tha tak a ni leh zirna ina intihduhdahna, ragging awm miah lo a zirlai ten zirna an kalpui thei chu lawmawm a tih thu a sawi a ni.

MZU Vice Chancellor Prof. Dibakar Chandra Deka pawhin thu sawiin kum 24 chhungin Mizoram University chuan higher education-ah mite hriat nasa takin a hlawh hman a ni a ti a. India ram state dangte mai bakah ram dang atangin zirlai tam tak an neih thu sawiin tunah hian zirna huanga School of Law, Physical Education leh Sports Education lam hawng thar turin hma an la mek tih a sawi bawh a ni.

Vawiina hun hmanaah hian Pahalgam-a mi firfiakten khualzin mi tam tak an tihhlum leh Pope Francis sun nan ngawi renga ding turin Larsap in a ngen angin mipuite an ding a ni.

HALF MARATHON

Naktuka Aizawl International Half Marathon neih tur atan hriat theih chinah mi 1,373 an inziaklut tawh.

Aizawl International Half Marathon hi Sports & Youth Services Department, Athletic Federation of India leh Innovations India Pvt. Ltd. te tangkawp buatsaih tur niin inziahluh theih hun chu vawiin tlai dar 6 khan khar a ni a. Akashvani thudawn danin, Intihsiakna hi hlawm thum a then a ni a, Half Marathon - km 21.097 a thui te; Open Race - km 10 a thui te bakah Fun Race - km 5 a thui te a awm dawn a ni.

Aizawl International Half Marathon hi Athletics Federation of India (AFI) pawmpui a ni a, an ni hian intlansiak pawh an rawn endik dawn a. Intihsiak hi Larsap Gen (Rtd) Vijay Kumar Singh leh Chief Minister Pu Lalduhoma te'n patron an nih angin an uap dawn a ni.

Intlansiakna tur kawng hi Aizawl khawpui chhuahlam World Bank Road-a a ni dawn a. A bul tanna leh tawpna tur chu Rajiv Gandhi Stadium a ni ang. Intlansiaka tel tur te chu zing dar 5:30 AM-ah Rajiv Gandhi Stadium thlen hman tur a ni a. Zing dar 6:00-ah warm up an nei ang a, intlansiak hi zing dar 6:30-ah tan a ni ang.

<><><>

WORLD MALARIA DAY

Mizoram chu ramchhunga cheng zat a chhuta Malaria vei tamna ber state a ni.

National Health Mission hnuaia National Vector Borne Disease Control Programme chuan vawiin khan Dawrpui Multipurpose centre-ah khawvel pum huapa sikserh natna do letna ni, World Malaria Day an hmang a, he hunah hian Mizoramah Malaria natna a la hluar thu leh, tun dinhmunah India ramah mi sang khat zel atanga malaria vei hmuhchhuah zat atanga chhutin Mizoram chuan Malaria tamna ber state nihna a la hauh chhunzawm mek thu leh, Malaria dona kawnga tan lak a tul thute thawktute chuan an sawi.

Mizoram-ah hian kum 2023 khan Malaria vei mi 18005 awmin, mi 13 in an nunna an chan a. Nikum, 2024 ah khan Malaria natna vei mi 16899 an awm a, nunna chan mi 7 an awm bawk a ni. Kumin 2025 Jan-March thla chhungin Malaria hmuhchhuah tawh zat hi 866 niin nunna chan an awm lo thung.

Vawiin hun hmanah hian Health Minister Pi Lalrinpuui chuan kum 2027-a Malaria umbo vek hman turin kum 2 chauh a awm tawh avangin uar lehzuale theihtawp chhuah a tul tih a sawi a. Mizoramah chuan Mamit, Siaha, Lawngtlai leh Lunglei district te chu Mizorama Malaria kai tam berte an nih avangin heng district hrang hranga Village council te chu theihtawp chhuahpui turin a sawm a, thosilen damdawia chiah zar kawngah te, thisen test leh damdawi ei kawngah te mipui fuih turin a ngen a ni.

<><><>

AMC

Aizawl Municipal Corporation (AMC) chuan dan kalha kawng kama thil zuar thin te, hmun him zawka sawn hna a thawk mek a; a tah tawlin hmalak chhunzawm zel a ni dawn a ni.

He hmalakna hi Aizawl inrelbawlna a felfai zawk nan a hmalakna a ni tih AMC chuan a sawi a; mipuiten eitur tuihnai zawk an lei theih nan te, kawng kama thilzuar te leh a dawrtute himna tur te, kawngpui tawt lutuk tihziaawmna tur te a ni a, chuvangin hmalakna hian Aizawl mipuite thlawp a hlawh hle nia hriat a ni.

Venghlui Local Council leh Tuikual South Local Council huamchhunga kawng kama thil zuara thu zawng zawngte chu AMC Multi-Complex Tuikual South ah an thutna hmun buatsaih sak vek an ni a. Chuvangin, Venghlui Local Council leh Tuikual South Local Council huamchhunga kawng kamah street vendor tumah thu lui tawh lo turin AMC chuan hriattirna a lo chhuah tawh a, heihi khauh taka kenkawh chhunzawm a ni dawn tih an sawi a ni.

AMC chuan kawng kama dan loa thil zuarte survey hna a thawk chhunzawm zel dawn a, April ni 26, 2025 (inrinni) hian Chanmari Local Council leh Khatla Local Council huamchung survey a ni ang.

<><><>

EDU FAIR

Zirlaite tana zir chhunzawm zelna tur chungchang hrilhfiarna leh buaipuina, Edu Fair chu vawiin khan Aizawl Millenium Centre Rooftop ah buatsaih a ni a, naktuk thleng a awh ang.

Edu Fair buatsaihtu zinga mi, Sape Events And Media Pvt Director - Sanjay chuan Mizo zirlaiten ramchhung hmun hrang hranga zirna leh zir tur awm an lo hriat zau zawk nan leh an hriatthiam theih nan Edu Fair chu buatsaih a ni a ti a, Pawl 12 zirlaite tan zirna sang zawk hriatchian tuma hmun hla tak pan ngai lovin, Aizawlah ngei ram chung hmun hrang hranga University chungchang fiah leh Chiang taka an zawhfiar theihna a nih avangin zirlaite chu Edu fair-ah hian kal theuh turin a sawm a ni.

Edu Fair-ah hian state hrang hranga private university leh central sorkar hnuaia zirna in 26 te an in phochhuak a, an zingah hian Mizoten an la hmelhriat vak loh, Indian army, Indian Airforce leh Indian maritime University te pawh telin Mizo thalaite tan sipaia luh theihna te an sawifiar a, Mizo thalai tam zawkte chuan sipaia luh dan hi an hriat loh avangin Mizoram tana vacancy awm te chu midangin an luah sak fo tih an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

SOCIAL WELFARE MINISTER

Social Welfare, Women & Child Development Minister Pi Lalrinpuii'n tunlaiin naupangte zingah phone en nasat lutuk avanga autism a hluar nia lang chu a ngaimawhawm hle a ti.

Vawiina Directorate of Women & Child Development buatsaih Poshan Pakhwada, 2025 kharna inkhawm, Vaivakawn Cultural Centre cum Auditorium-a neihah Minister Pi Lalrinpuii chuan thusawiin, Poshan Pakhwada hnuaia Department hmalakna kaltlanga ei leh in hrisel leh chaw khawpkham loh pawl theihzia inzirtirnat chu naupang than chhohna kawnga nu leh pate hriat atan a pawimawh hle a ti a, Niti Aayog pawhin naupangte zingah thau lutuk, obesity an tam chu a ngaimawh hle a, hemi chungchanga tan lak theih dan tur kawng ngaihtuah chu thil hmanhmawhthlak tak nia a hriat thu a sawi a. Hei bakah hian Minsiter chuan tunlaiin naupangte zingah phone en nasat lutuk avanga autism hluar nia lang chu ngaimawhawm hlea a hriat thu sawiin , nu leh pa ten nasa leh zuala ngaihtuahna an sen a tul hle a ni a ti a. Ei leh in thuah pawh Mizoram pawn atanga thei leh thlai lakluhte ni lovin Mizorama thar chhuah ngei chawi lar zawnga Department hmalaknate chu uar sauh sauh zel tlak ni a a hriat thu a sawi a, hnam hrisel tak ni zel thei tur leh chhuan lo la awm tur te chena ro tling hnutchhiah thei turin kalkhawmte chu thawhpuih a sawm a, Panchayat Meet & Poshan Pakhawada 2025 chu a khar nghal a ni.

Vawiin hun hmannaah hian AMC huamchhunga Local Council hruiatute sawm an ni a, Women & Child Development Addl. Secretary, Pu Lalnunhlua'n inkhawm hi a kaihruai a, Women & Child Development Director, Pi Zoramthangi Chhangte chuan Integrated Child Development Services, ICDS leh Anganwadi chungchanga khawtlang mipuite nena tanrual pawimawhna leh hemi kawnga Department-in hlawhtlinna a taka an hmuh tawhte a sawifiah a ni.

<><><>

UNION HM

Pahalgam firfiaka chetna avanga Pakistan mite visa tihtawp anih hnua Union Home Minister chuan state tin Chief Minister te chu an state theuha Pakistan mite zawng chhuak turin a ti. Pakistan-a an let thuai theih nana hma la turin Union Home Minister chuan Chief Minister te hi a chah a ni. Zanin hian New Delhi-ah Union Home Minister hian Indus Water Treaty chungchangah Union Jal Shakti Minister C R Patil leh sawrkar official te a sawipui dawn bawk a ni. Puan tawh angin firfiakte chetna a thlen hnu lawk khan Indus Water Treaty hi India chuan a ti tawp a ni.

<><><>

FRANCE PRESIDENT

French President Emmanuel Macron chuan Pahalgam firfiaka chetna chungchangah India lamah a tang tlat tih a sawi. President Macron hian Prime Minister Narendra Modia hi telephone hmanga biain firfiaka chetna chu a dem thu leh vanduin tuarte a tawrhpu thu a sawi a. France leh a thawhpui ramte chuan a tulna apiangah firfiakte an do chhonzawm zel dawn tih a sawi bawk a ni.

<><><>

ARMY CHIEF

Army hotulu ber General Upendra Dwivedi chuan vawiin Jammu & Kashmir-a Srinagar a tlawh a. General Dwivedi hi sipai hotuten lo dawngsawngin thil thlen dante an lo hrilhfi ah a. Sipaiten firfiakte lakah hmalakna an kalpui dan leh Pakistan-in LoC a inkahhai an bawhchhiat dante an lo hrilh a ni. Army Chief hian firfiakte chetna Pahalgam-a Baisaran ngaw hmun a tlawh bawh a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 121-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawh ang.

<><><>